

四庫全書

集部

欽定四庫全書

宋元詩會卷四十六

兵部主事陳焯編

楊簡

字敬仲慈谿人乾道五年進士授富陽主簿會陸九淵過富陽問答有所契遂定師弟子之禮為紹興府司理忤其帥引去用薦差浙西撫幹改知嵯縣丁艱服除知樂平縣召為國博以疏救趙汝愚被斥嘉泰四年賜緋衣用朝散郎權發遣全州寧宗立授祕書郎遷著作以旱蝗陳言不用求外補知温州民愛之如父母咸畫像以祀遷駕部郎歷國史院編修移疾請去連主宮觀理宗即位加中

大夫致仕卒生平著作甚富咸淳  
間門人即其所居作慈湖書院云

撫琴行

蕭蕭指下生秋風淅淅幽響颼寒空月明夜氣清人骨  
何處仙臂搖丁東野鶴驚起舞流水咽復鳴一歎三唱  
意未已悠悠話出太古情龍吟虎嘯通神怪千山萬壑  
風雨晦海濤振蕩林木響亂撒金盤氷雹碎和風回春  
陽縹緲孤鸞翔三江五湖烟水濶波聲颼颼鳴漁榔悲  
猿臨澗欲渡不敢渡但聞澗下蕭瑟松風長閒雲洩碧

落勢去還迴薄神仙恍惚無定所微吟似欲止所作馭  
風一笑歸蓬瀛猶有餘音遠寥廓

鳳遊山潮泉

妙藏天地秘神斧為誰開水性原流下山靈強勒回

戴曷

字景明號東野石屏之從孫嘉定乙卯  
進士官贛州法曹叅軍有東野農歌集

莫悲秋

傷春非貞女悲秋非烈士時運自循環我心如止水剝

固復之機榮乃悴之始未識天地妙胡為浪悲喜鷄蓬  
或數仞鵬海或萬里大小何必齊蒙莊未窮理

侍屏翁遊屏山分得水字

攜琴入空山脩竹翠相倚一曲千古心泠泠寄流水拂  
雲卧白石冥搜契玄理有時采薪人歌聲隔林起

秋日過屏山菴

淒切抱葉蟬間關栖樹禽入山本避喧復愛聆此音微  
颺動夕爽薄雲散秋陰衆籟聞以靜片月生東林

逐瘧鬼

咄哉瘧鬼何冥愚沈魄猶滯江流居孰云胄出高陽氏  
而乃不肖如此歟為妖常闖秋令動作威又竊炎官餘  
今年恣睢逞暴瘧十戶九室聞嗟吁人生一歲一寒暑  
自有大瘧纏其軀翻手為涼覆手暖笑爾禍福纔須臾  
癡兒騃女或汝怖那能嚇我烈丈夫汝不記少陵詩句  
有神語子璋髑髏血模糊昌黎譴逐更多術灌毒炷艾  
揮靈符今來古往共憎疾奈何長惡終不渝胡不學鮫

人細織冰綃製雲裾胡不從湘君緩移桂權寒芙蓉乃  
甘卑滌賈衆怨厭襁唾罵無時無爾來經旬瞰吾室再  
三謝遣猶跼踖吾詩吾酒既不廢汝窮汝技將何如大  
江秋色正瀟灑明月皎皎風疎疎便須悟悔速歸去嘯  
儔呼侶相嬉娛夜闌吟徹欲就睡燈花照眼團如珠夢  
回病思砉然散颯颯風籟生庭梧

納涼即事

炎蒸欣傍晚埽地坐寬涼入竹風逾冷生荷水亦香蟻

行緣食几螢照落書牀聽得農人語今年稻穗長

偕兄侍屏翁探梅分得空字

踏破登山屐來尋傍水叢眼明千樹底春在數花中格  
瘦詩難寫香寒酒易空狂歌歸秉燭驚怪走兒童

安居

安居元自好春晝更遲遲雪涌煎茶鼎雲生浴硯池栽  
荷填廢沼移竹補疎籬猶有閒光景欹眠續舊詩

自武林還家由剡中



一筇雙不借役役又東還野渡淺深水夕陽高下山光  
陰虛我老造物斬人間高躅思吾祖鳴琴獨閉關

春晚即事

春郊農務急野岼水痕高蒲渚鳴姑惡桑林嘯伯勞整  
欄扶芍藥牽網護櫻桃不改窮居樂何妨見二毛

次韻屏翁初夏會芳小集

一觴還一咏竟日醉難成坐石驚雲濕臨池愛水平密  
林宜午蔭啼鳥尚春聲更有櫻桃約明朝且願晴

秋晚

西風澄曉氣凝觀  
愜幽情艸潤蛩聲滑  
松涼鶴夢清吟  
懷依水靜病思得秋輕  
忽憶登高近循籬看菊英

夏曼卿作新樓扁曰瀟湘  
片景來求拙盡且索亭

詩

有此一樓足悠然  
萬慮忘拓開風月地  
壓斷水雲鄉四  
野留春色千峰明  
夕陽眼前無限景  
何處認瀟湘

十日取野菊從酒

野徑菊仍好村壚酒亦嘉  
未應今日蕊便是背時花  
心在家千里身猶客  
九華官程難久駐  
風雨暮山斜

從板橋買舟上青陽

卸馬板橋西扁舟逆上溪水  
鏤巖骨斷煙截樹頭齊  
野鴨驚人起村雞上樹啼  
老農頭雪白猶自把鉏犁

書初考

得考雖多幸無功祇自嫌  
但求官速滿不道老同添  
卑拙翔蓬鷄艱辛上竹鮎  
黃花寒更好三嗅憶陶潛

謝趙山臺見訪

寂寞海東頭，殷勤貴客舟。  
如何經歲約，祇作數宵留。  
清玩分行篋，高吟壓小樓。  
更須謀作會，同醉菊花秋。

僻居

地僻塵先遠，身閒味覺深。  
清池涵竹色，老樹帶藤陰。  
引鶴隨安步，招蟬伴醉吟。  
有時然古鼎，隱几自觀心。

屏翁領諸孫小集野亭即席次韻

結屋新亭好，登臨野興長。  
心融八竈白，塵隔九衢黃。  
泛

菊金英碎嘗粳玉顆香更期梅着蕊來賞小春光

山家小憩即景效藥名體

柴門通草徑茅屋桂枝間修竹連翹木高松續斷山仰  
空青蔭密掃石綠花斑傍澗牽牛飲白頭翁自閒

永嘉薛君自號雲屋來池陽以詩見貽用韻答之  
清晨聞剝啄喜得薛能詩風月一囊錦江湖兩鬢絲寒  
城吹角夜孤館擁衾時誰會吟心苦梅花是舊知

立春前五日得雪

雪作春前瑞銀城擁萬家太婆頭欲白九子頂先華壓  
麥嘉培本封梅惜損花家童解人意燒鼎問烹茶

太婆九子

俱山名

### 幽棲

幽棲頗喜隔囂喧無客柴門盡日關汲水灌花私雨露  
臨池疊石幻溪山四時有景常能好一世無人放得閒  
清坐小亭觀衆妙數聲黃鳥綠陰間

### 此生

此生畢竟已蹉跎有酒何妨醉且歌人世盡緣愁得老  
春花偏被雨相魔草欺蘭瘦能香否杏花笑梅殘奈俗何  
誰上東樓看霽景海山無數列青螺

春事

春事關心常起早愛看景物試凭欄戲魚池面微添綠  
啼鳥枝頭尚帶寒斬棘重樊新插柳料泉頻灌自我蘭  
年來賸有園林興每恨廬邊地不寬

自況

多貲徒作守錢奴  
伏臘無憂便有餘  
世路本夷休自險  
人情太密反成疎  
非圖報施方為善  
豈為功名始讀書  
門外良田堪種秫  
自牽黃犢試犁鉏

次君玉弟聞新鴈

霜風颯颯荻花洲  
避北趨南巧自謀  
倦翮飛殘千里月  
寒聲催老一天秋  
乍教騷客驚詩夢  
莫為征夫寄別愁  
汝度塞垣應未久  
新來烟燧已沈不

次韻東渠兄觀梅



詩眼非梅不可遮三葩五蕊便堪嘉瘦如飯顆逢工部  
老似礪溪卧子牙水影月香參衆妙弟酬兄倡自成家  
快筭新醞同清賞莫待枝頭爛熳花

七夕感興

家家懽笑迓星期我輩相邀只酒卮矯俗何須標犢鼻  
甘愚不解候蛛絲新秋光彩月來處半夜清涼風起時  
一曲玉簫塵外意此音除是鶴仙知

抵池陽未入關泊于齊山數日因窮巖壑之勝

瘦策相扶上翠微  
眼驚奇怪足忘疲  
三十六洞猶昔者  
四百餘年無牧之  
漲水淼瀰春雨後  
遠山重疊夕陽時  
幾多江北江南恨  
問着沙鷗總不知

賞茶

自汲香泉帶落花  
漫燒石鼎試新茶  
綠陰天氣閒庭院  
卧聽黃蜂報晚衙

夜過鑑湖

推篷四望水連空  
一片蒲帆正飽風  
山際白雲雲際月

子規聲在白雲中

嚴子陵

赤伏君王訪舊遊  
富春男子只羊裘  
一竿本為逃名去  
何意虛名上釣鉤

里中小漁舟被差防江有感而賦

着身平地更多憂  
一樞思為泛宅謀  
昨夜西風邊報急  
防江也要釣魚舟

劉宰

字平國金壇人既冠入鄉校卓然不苟於去就舉  
紹熙元年進士調江陵尉遷真州司法時有偽學  
之禁不讀周程等書者方許與考試宰不奉詔授  
泰興令決獄多奇中會韓侂胄謀用兵宰為浙東  
倉司幹官職事修舉急引去無復仕進意自是屢  
召不起端平初朝廷獎用老成一時譽望收召略  
盡所不能致者宰與崔與  
之耳尋卒鄉人為之罷市

### 東陽道旁涵碧亭

四山委蒼翠一沼湛清漣雲飛松竹礙石墮藤蘿牽泉  
音亂絲竹鳥語賡笑言斯亭作者誰俛仰四百年檐宇  
有興廢篇章足流傳官道紛往來此地曠周旋乃知造

物意以遺靜者使我來早曠餘龜兆圻平田攀崖溯源  
委石竇鳴涓涓摩娑兩石魚變化定何年

漫塘觀雪分韻得遠字

入臘甫自茲得雪殊不晚凝寒祛厲氣積潤滋麥本清  
興浩無極步履忘足蹇扣門呼石交頸縮語猶謦挾攜  
事登眺南去還北反所向遊目礙僮若虎就圈歸來漫  
塘上四望與天遠蓑重漁舟歸煙橫樵舍飯稜層敞瑤  
池燦爛開瓊苑玉龍擁寒城銀海迷疊巘頗喜漫翁貧

覽富逾北阮呼兒具杯酌採掇飜疏畹不辭多酌我自  
愧飲河鷃少焉歛夕氛桂魄爭婉婉飜思造化工舒卷  
意難忖

崇禧夜坐

淮浙千萬山茲山鍾秀異山中四時好雪景更佳耳危  
樓俯八荒豈無超詣士春遊眩紅紫秋賞挹蒼翠衝寒  
繚冰崖問訊世能幾山神出奇觀似慰遠來意漫空飛  
六花匝地掩蕪穢頗疑羣玉府飄墜人間世又疑姑射

僊與物洗疵癘意行輒有得曠望了無際更欲呼雲車  
御風駕六氣舉酒酌初平逍遙聊卒歲

夜夢續句

乙丑四月四夜夢中得句云昏旦視生死又云不種  
桃與李覺坐而思豈吾壽不延歟因就枕上足而成  
詩

大化賦羣有脩短亦天只彭殤誰得失鵬鷃均適已我  
今識其然昏旦視生死青青竹籬下不種桃與李老薺

怙春柔叢蒿麗芳旨耘鋤藉人力四時自終始屬饜幸  
朝夕過計胡為爾勿笑趙孟偷甚矣吾衰矣

送李秀巖歸蜀

平生秀巖翁嘉遯輕朝衣聖朝重特招趣駕不容違我  
豈匏瓜哉先聖固所希長江一萬里舟行疾如飛東南  
盛人物十九飫甘肥頗藉子公力寧知伯玉非翁豈好  
異同曰余起布韋忍比淮之水東下雜於泚論奏了不  
阿正直鬼神依讒言嗟止棘曰歸詠采薇歲晏江濤平



雨雪從霏微懸知到家日花竹遶山扉

吳門道歸書懷

投閒三十年日與木石俱暮景際休明搜羅逮樵漁洪  
造賜甄收羣公交薦書殷勤奉明詔婉戀辭田廬一寒  
不自揣五窮暗擲掄行行步京畿迎勞多軒車眼青見  
故人皆歎此老臞形容不自惜奈此氣昏愚席間迷舊  
識筆底誤新書十目所共睹一語良非虛儻昧知止戒  
不反田園居去去入修門蹇步接天衢深虞眩聞見狂

易滋發舒籲天寫真情浩歌賦歸與

贈九華程君

君家九華山山翠常在目雞犬聲相聞山腰幾隣曲本  
固枝葉蕃無若君之族當年紫橐翁一念盡親睦俸餘  
不自有買田徧溪谷計口給之食昏旦常陸續吉凶更  
資助當使有餘蓄只今大江南盛事君家獨君歸廣此  
意勝處新卜築周遭植名花中間敝家塾少長驅之學  
毋間親疎屬庶幾子又孫更衍無窮福亦俾作法人百

世流清馥

喜客泉

物我未忘情無情惟止水底事山中泉客來如有喜悠然鏡面平倏爾魚眼生依焉開笑面似與客逢迎客喜泉豈知泉笑客何有邂逅深山中聊結無情友

松風軒晚望

遠山迓歸雲近山留夕照澄江橫淨練怒風收衆竅東南佳山水此地宅其要連甍三萬家金碧互輝耀閒房

列歌舞傑觀富登眺物理會有極却慮成悲嘯我家三  
茆峰一室倚青峭下有荆溪水水深魚可釣歸歟有成  
計靜坐觀衆妙功名付公等連茹祇明詔他年問無恙  
短策寄嶺嶠浩歌暢幽懷狂斐君勿誚

送魏華甫侍郎謫靖州

靖州風物最五溪畬田歲入人不饑淘沙得金遨以嬉  
瘴烟不逐嶺雲西六花瑞臘春臺熙尤便逐客過徃稀  
理亂黜陟了不知夫子豈欲居九夷要尊主勢扶時危

有言不用時我違翻然不受好爵羈向來鄉行誰可晞  
平生易名慕者誰蘇陳凜凜百世師畏塗萬折甘如飴  
陽烏當天照隱微直前一疏可忘之江頭後會端有期  
暗香欲動寒梅枝

石翁姥

采石江頭風晝息掀天雪浪平如席沿崖小泊客心寬  
攀蘿曾看望夫石天涯望斷人不歸露寒猶想淚沾衣  
爭似石翁攜石姥年年對峙夾岡道人歸人去我何心

雨沐風餐人自老，比翼鳥連理枝年多。  
物化徒爾為長生，殿裏知不知。

寄和趙章泉

章泉先生虎豹章，餘子駭逐狐兔藏。  
少陵遊不返衡湘，孤吟風月老林塘。  
鴛鴦不送，置我傍，悵望空勞水一方。  
廣文別日天未霜，殷勤寄音示無忘。  
新詩寫作鴻雁行，憐我病骨猶未康。  
續貂聊復寄歸航，宮牆百雉如金湯。  
登門歲月知何當，江湖極目煙波蒼。

送王穎叔分教山陽

向來肉食昧遠謀坐談欲復千古讎良平不逐勝缺遊  
毛錐竟作書生羞楚山蒼蒼楚水流甲光向日金鱗稠  
酒闌一笑看吳鉤將軍意氣傾九州先生身短智則脩  
百鍊可使繞指柔安邊端藉帷幄籌泮宮還獻馘與囚  
英聲南來動冕旒貂蟬未必生兜鍪

過司徒墓

司徒墓荒塚累累不知數草中翁仲無復存壟上牛羊

自朝暮想見當時百萬松佳城在處鬱蔥蔥車馬時來  
卿相子鐘魚聲出梵王宮年深事遠無留蹟只與耕夫  
資墾闢萬古同成一斛塵官爵高卑誰汝識

發紹興

留滯青春晚經行此日初柔條桑著眼短穗麥生鬚竹  
外雲埋屋花邊水遶渠箇中容我老肯遺子公書

馮公嶺

地隘人逾峻人勤俗不奢時培石上土更種竹間茶接



畛田成篆連筒水濺花征塵如不到老我即東家

長林海邊道上

海霧曉逾合海風春更寒  
衰顏欺薄酒老膽傲驚湍  
叢竹人家近平沙客路寬  
明朝應更好山翠撲征鞍

松江道中

久作松江夢重來泛短篷  
淡雲飛急雪枯葉戰狂風  
煙末三家市波心一釣翁  
鴟夷身計耳吳越等成空

偶成

月下浮舟去雲邊曳杖行物華隨節換人意與秋清小  
圃蔬逾潤荒叢菊向榮幽尋元自好底用絆浮名

天台道中

花重朝扉散鳥啼春意深風光自流轉行役負登臨澗  
水流紫綠山雲捲夕陰病容兼白髮漂泊此時心

秋晚

木落山呈骨泉空水返源知時秋燕去負日午蜂喧玉  
粒慳晨甌金英卧晚園歲華今已暮身世兩忘言

和韻呈李果州

行樂非吾事朋從慰此生  
劇談忘夜永起立覺晨清  
黃獨幽人供朱絃太古聲  
他年盛山集不假退之評

感懷寄趙章泉

我屋方茅下君家閩楚交  
鹿門知得計燕幕未安巢  
澗谷泉從飲山田飯可抄  
應攜靈壽杖雪蕊嗅梅梢

北固山望揚州懷古

北固城高萬象秋  
煙竿一縷認揚州  
試乘綠漲三篙水

要見朱簾十里樓  
淚濕宮衣朝霧重  
愁薰寒草夕陽浮  
隋堤舊事無人問  
兩兩垂楊繫客舟

懷徐表兄

一笑相逢句曲天  
別來十五換流年  
忍思清渭玫瑰詠  
無復通泉寶劍篇  
北渚春回芳樹合  
西山日暮碧雲連  
雁來數寄平安信  
無限離思若箇邊

寄潘子善上舍

陳少陽率太學生伏闕上書  
六賊遂退天下快之少

陽猶以後書論李邦彥白時中等言不用拂衣去近  
傳太學伏闕書是歟非歟非山林人所得知獨怪朝  
廷不用其言諸君仍苟安於學豈以靖康時事視今  
日緩急異耶為賦一詩質之同志

少陽一疏折羣姦拂袖歸來日月閒誤國小人猶法從  
叩閣諸子自賢關是非頗亦通千古義利那能立兩間  
若向西湖浮畫舫好傾卮酒酹孤山

裘萬頃

字元量新建人淳熙進士嘉定癸酉除吏部架閣  
明年遷大理司直疏力丐外較差江西撫幹以便  
祿養卒于家有竹溪集

### 行役

宿霧鎖山椒落月挂林側崎嶇歷岡巒髣髴辨阡陌秋  
高風露寒道遠時序迫安得歸故園篝燈理書冊

### 羅溪橋

我來從西昌日日困塵土誰知羅溪橋淨若初過雨長  
松列左右清風奏宮羽薄暮舍籃輿扁舟渡溪去

病中聞伯量相訪寄之 二首

我屋脩竹根身閒境逾靜維摩本無心誰令示人病夕  
陽耿疎林影落莓苔徑佇立有所懷高人倘乘興  
高人在城郭應酬頗紛如憶我烟霞栖遺我一紙書雨  
餘窻戶涼蛩聲滿階除相過有成言何時命巾車

次韻伯仁善利閣小室

山林吾所廬夜月但對影焉知江上人一目了萬境蹇  
裳步崇臺有室妍且靜徘徊不能去坐見四山暝

見雪

玄冥當語誰餉我一簷雪吾廬本來靜得此更清絕遙  
憐北海上往往已盈尺齧羶人在否毋陵子卿節

出門

出門復入門吾行竟安之攜書北窻下翻閱聊自怡有  
懷千載人掩卷還歔歔采采首陽薇戀戀商山芝一裘  
或終身欣然釣江湄斯人不可作斯道日湮微目前稻  
粱謀鳬鴈方齊飛青田寂無音歲晚將疇依慎勿出門



去塵埃染人衣

菖蒲

康廬入吾懷十載馳夢魂踵門者何人遺余以芳蓀歡  
然得其趣如對五老言幽姿出巖谷常帶冰雪痕塵容  
為一洗兩目不復昏忽思三峽流褰衣涉潺湲因仍一  
寸石浸潤九節根人言可扶老歲易須其蕃茲理諒不  
誣吾將從綺園

從人覓墨梅

熏爐束詩魂茗椀驅睡思掩關寂無營翰墨自娛戲山  
寒溪正清月澹雪初霽橫斜兩三枝見說可人意天機  
如胸中出手特餘事何時剪冰紈來對病居士

題余仲祥松齋

芳妍桃李場紛趨歛成蹊長松坐偃蹇遂爾不見知平  
生異時人不與俗轉移蕭然塵埃中擅此丘壑竒窻空  
境逾清四壁風來吹抱琴揖蒼髯喜氣掀兩眉臭味既  
與同相親不相違直期閱歲寒可但忘朝饑

夜坐薦福寺同玉成

鞭驚未暇相追逐且向祇園止君宿清談待得月華生  
窻戶明明耿殘燭誰令泉石墮吾前洗盡人間絲與竹  
風帆明發君不留此樂只應吾所獨

厭原山中曉行

碧雞夜半聲啁哳喚起幽人步林樾秋高風露着羣木  
無數寒花泣明月松篁一徑宛如畫石溜涓涓更清絕  
山巔便好結茅廬莫待他年鬢成雪

贈拂雲主人

十年作計須種木一日不可使無竹道人於此得三昧  
綠霧中間着蒼玉拂雲誰為名其居我亦心同雲捲舒  
相期直覓飛霞佩不用重拈種樹書

雨夜

秋事雨已畢秋容晴為妍新香浮穠樾餘潤溢潺湲機  
杼蛩聲裏犁鋤鷺影邊吾生一何幸田里又豐年

用鄭浮梁韻簡園師

杖屨山蹊窄鐘魚佛界深寒梅殘屋角春薺老牆陰一  
水元無恙扁舟尚可尋煩師掬清溜為我洗塵心

酬胡伯仁

山長飛鳥急江濶去帆微唱晚幾漁笛憑高一釣磯從  
君濯冰雪滿袖得珠璣三嘆不能已歸來吟夕暉

送胡仲立入京

昔對延英日諸公嘆弗如敢言天下事不負案頭書此  
去朝雙闕懸知有異除榮途方着脚未用曳長裾

贈施真人

素鞵方多難丹砂倘一逢  
勿疑蕉覆鹿會見竹成龍  
澗水遠仍潔巖花幽更濃  
行行望仙宇知在最高峯

留淺沙

故山豈不好蕭寺亦堪居  
作意多成礙無心始自知  
鐘魚飽香積枕簟熟華胥  
但惜詩成後傍無阿買書

晚步

日落欲閉戶風清聊杖藜  
千山猶帶雨一徑已無泥  
漈

漱水聲急悠悠雲影低催歸緣底事着意傍人啼

書晁文元道院集

華屋金狨座雕鞍駟馬車才堪誇世俗早已落丘墟此  
病久沈痼無人解掃除千年子晁子道院有遺書

偶成

松徑煩風掃柴門為雨扃行攜道院集坐對敬齋銘好  
事心常記閒談耳不聽觀空為世誤無異醉初醒

老屋

老屋久欹側，隨宜聊拄撐。  
吾今且共住，緣盡會須行。  
雨打從教壞，風搖不用驚。  
世間虛幻相，聚散本無情。

寄題喻高士澹軒

世事邯鄲枕，生涯老子書。  
能知澹中味，雅稱竹間居。  
石徑排雲入，霜根帶月鋤。  
紛華不到眼，贏得玩清虛。

題洪內翰爽榭

霧閣雲窻天外安，懸知幽趣勝人間。  
簾櫳夜月浮銀海，桃李春風醉玉山。  
自笑紅塵無暇日，浪憑清夢覓商顏。



何如飛佩隨君後細看匡廬紫翠鬟

夜坐

爐火篝燈孰與同此心吾欲付冥鴻茅簷已作涉旬雨  
蕙帳不禁連夜風一段清愁詩句裏十分寒事酒盃中  
溪雲未用安排雪且聽梅花試小紅

玉山道中時赴掌故之命

麥苗堆綠菜花黃一簇人家古道旁酒熟不妨邀里巷  
年豐贏得事農桑世情只說宦遊好客裏那知歸興長

我有平生蓑笠在釣絲何日理斜陽

端午上饒道中

一春留滯在京華午日依前未到家  
細葛香羅素無望黃塵烏帽亦堪嗟  
爭舟野渡人如簇立馬郵亭日欲斜  
遙想埴簾獻親壽綵衣羅拜酌流霞

睡起書懷時諸公相勉再出

北窻終日廢書眠一枕清風值萬錢  
雲度茆簷輕冉冉泉生石砌淨涓涓  
不嫌雨脚花間注要聽秋聲屋外傳

三徑初成吾欲老幕中何用泛紅蓮

喜范光伯相過

章江東下幾灣洄誰伴臞仙夜探梅離別不禁詩社冷  
遭逢莫放酒船回冰霜滿眼歲將換花柳轉頭春又來  
安得飛騰九霄外鞭鸞答鳳日相陪

柬黃子益二首

青衫日日困塵沙安用浮名與世誇已過半生真似夢  
未荒三徑且還家恨無沈水紆香穗喜有寒泉瀹茗花

袖却西歸遮日手園林幽處看桑麻

睡起忻然思慮少病餘猶覺應酬艱招搖風月聊須竹  
收拾雲煙幸有山但要世緣隨手斷莫憂詩債幾時還  
追奔富貴非吾事且占林泉一味閒

題懷秀堂

莫教滿地長莓苔杖屨從今日日來曲徑要隨松巷轉  
柴門須對石橋開牆頭花木因時種案上圖書任意堆  
幸有林泉可投老忍將雙脚踏塵埃

大雪次前韻

誰知天巧出玄機，但怪飛璫過眼奇。  
暝立風枝寒雀倦，愁吟冰谷曉猿饑。  
蘆花洲渚月明夜，柳絮池塘春暮時。  
此景人間不長有，寫真傳影正須詩。

次洪內相梅亭

人間多是梅開後，旋種東籬事故常。  
那得紅簾捲朱戶，細看素質傲清霜。  
一生寄興雲山外，幾度搔頭江路傍。  
咫尺名園身未到，夜窻羞對返魂香。

入京道中風雨因賦以遂退休

新築書堂壁未乾  
馬蹄催我上長安  
兒時只道為官好  
老去方知行路難  
千里關山千里念  
一番風雨一番寒  
何如靜坐茅齋下  
翠竹蒼梧仔細看

閒居

閒居最與性相便  
勤即繙書懶即眠  
終日閉門真省事  
有時面壁似耽禪  
大椿歲籥祈親壽  
斷簡生涯聽子傳  
待問洪崖覓丹訣  
白雲深處引寒泉

用韻謝伯量過訪山中

勝遊千里笑談中  
雪片梅花正仲冬  
肯向簾門尋孺子  
更能草具重茅容  
春風頓覺生寒谷  
夜榻惟愁聽曉鐘  
半世梅坡門下客  
及今何幸得過從

次王成之韻咏梅

誰遣冰魂照夕陽  
搖搖一任北風涼  
眼前共有幾多蕊  
鼻觀胡為如此香  
佳實會須歸列鼎  
孤標已自壓羣芳  
濡毫我欲從君賦  
未害平生鐵石腸

送張高安入京

青衫十載蟾宮客墨綬三年鳳嶺頭循吏聲名武陽令  
故家風味富平侯江邊休歎雙鳬去天上行看一網收  
入簞鸕班立仙仗莫忘回首顧沙鷗

題小桃源

半月池邊倚瘦藤望仙臺上岸烏巾塵埃一點不到地  
花木四時長是春載酒豈無好事者爛柯應有着棋人  
請君更種桃千樹準擬漁郎來問津



保福寺對橙菊有感

平生愛菊陶彭澤清夜移橙杜草堂千載詩魂招不得  
獨留風味在僧房

次韻松風閣

四首

飛花數點雨初歇啼鳥一聲春正長讀罷黃庭了無事  
旋安銀葉試爐香

不見詩仙何遜來春風幾度早梅開竹籬茅舍自清絕  
未用移根東閣栽

簷間新燕幾時來  
簷外閒花徃歲栽  
丹杏碧桃渾落盡  
綠陰底處結青梅

無所用心魚在沼  
居然生子燕成窠  
誰言春去花事歇  
萱草石榴情更多

九日

籬落黃花尚自無  
白衣況未到五盧  
莫令此日負佳節  
為展淵明采菊圖

崔與之

字正子廣州人少卓犖有奇節不遠數千里遊太學紹熙四年舉進士授潯州司法參軍調淮西檢法官知建昌新城通判邕州擢廣西提刑風采赫然召為金部員外郎安撫淮東屢上書宰相爭納李全必有後憂在淮守戰兼修敵入無功和議遂寢以秘書少監召力辭不赴尋用煥章閣待制安撫成都開誠布公戎帥協和軍政以立召拜為禮部尚書辭理宗即位屢召俱辭最後授廣東經畧兼知廣州叛兵俯伏聽命上於是注想彌切進參知政事力辭乃訪以時政與之條奏懇至上覽嘉歎趣召愈殷控辭至十有三疏始得致仕以觀文殿大學士提舉洞霄宮年八十二薨謚清獻

送夔門丁帥赴召

議論方前席功名早上坡去帆瓜蔓水遺愛竹枝歌同

志星辰少孤愁暮雨多倚風窮望眼碧色渺平沙

送范漕赴召

獨汲千尋綆推開八面窻相逢俱氣許未語已心降分  
鎮中邊蜀歸途內外江禁林風雨夜應念鹿門龐

送時漕大卿淮西簡法二首

卿月高華照楚墟澄清雅意見登車星分屯壘雲中戍  
風引舩艍塞下儲十二聚民行惠政三千議獄謹刑書  
最聲烜赫流聰纘聖詔今朝下玉除

十年宦海任飄零，豈料光華伴使星。  
落魄半生頭已白，爬沙一見眼長青。  
天涯明月方依樹，淮上長風忽散萍。  
別淚誰能效兒女，不堪官柳暗長亭。

嘉定甲戌分閫東淮時金騎南奔人不願往以君  
命不敢辭留五年始以少蓬召而病且衰矣艤  
櫂南康夢人告之曰死於廬山之下覺而賦此  
行到廬山日日陰，斜風細雨亂雲深。  
移舟夜壑人間世，荷鋤春郊物外心。  
要把封疆安社稷，誰教軒冕換山林。

殷勤招隱吾知矣五老朝來露玉簪

姚鏞

字希聲剡人戴復古愛其才為忘年友通判吉州以平寇論功擢守章貢

春夜曲

金魚鎖合蘭缸小酒不支愁尋睡早梨花欲墮風更寒  
燕子不歸春自老流蘇護帳香雲結三十六簧清吹咽  
絨書欲寄湘水深城烏啼落花西月

題畫壁

兩山灌木帶晴鷗  
泯泯春流漾浦沙  
隔岼小舟呼不應  
碧桃花外是誰家

寓雪川

王戴谿頭小隱山  
漁翁引上雪谿船  
幾回倦釣思歸去  
又為蘋花住一年

教陶孫

字器之閩人寧宗時太學生題詩三元樓弔趙汝愚為韓侂胄所捕亡命江湖侂胄敗始登第

佳人佩明月贈俞德章

佳人佩明月笑語含春姿手握幽蘭叢照影清漢湄少  
年治遊子行樂方及時折苕戲相贈玉色頰自持歸來  
種白壁日漚文錦絲加幣欲聘子常恐歲月遲終然不  
可諧翕歛聽所之願言遺鄉澤遠慰千里思

三元樓題壁弔趙丞相

左手旋乾右轉坤如何羣小恣流言狼胡無地居周旦  
魚腹終天弔屈原一死固知公所欠孤忠幸有史長存  
九泉若遇韓忠獻休說如今有末孫

按三元樓臨安  
酒肆也韓侂胄



既逐趙丞相汝愚至衡州暴卒教聞而弔之適飲酒題詩於壁酒未盡醺其壁已昇去教知必為侂冑所廉急易傭人衣持酒具下樓已遇捕者至問教上舍在樓否對曰方酣飲急亡命走海隅得免



宋元詩會卷四十六

欽定四庫全書

集部

宋元詩會卷四十七

詳校官中書

臣陸

湘

主事銜臣徐以坤覆勘

總校官知縣臣繆琪

校對官中書臣牛稔文

謄錄監生臣任應銳

欽定四庫全書

宋元詩會卷四十七

兵部主事陳焯編

魏了翁

字華父邛州蒲江人年數歲從諸兄入學英悟絕  
出鄉里目為神童登慶元五年進士第時方諱言  
道學了翁於對策昌言之由簽書節度判官召為  
國子正開禧元年召試學士院韓侂胄方事開邊  
了翁力陳其不可謂當急於內修姑緩外攘策出  
衆大驚改秘書省正字明年遷校書郎以親老乞外  
任乃知嘉定府旋丁父憂築室白鶴山下遠近從  
學者踵至起知漢州以細故予祠未數月復原官

知眉州士論大服治行彰聞擢潼川路提點刑獄  
歷提舉常平轉運主管潼川安撫丁母憂起知潼  
川府十五年被召入對蓋去國十有七年矣上迎  
勞優渥嘉納其言進兵部郎中俄改司封兼國史  
院編修奏事剴切無所鯁避而時相始不樂矣寧  
宗崩理宗自宗室即位事多艱虞了翁積憂成疾  
三疏求退不得遷起居郎明年改元寶慶屬濟王  
黜削以死有司顧望治葬弗虔了翁請上厚倫紀  
以弭人言史彌遠益嫉之言官承風旨劾了翁朋  
邪謗國降三官居靖州五年起知瀘州彌遠死進  
華文閣待制應詔上章乞復舊典十事皆如所請  
因從人望與真德秀並召還了翁權禮部尚書兼  
直學士院上將引與共政而忌者合力沮排不能  
安于朝矣乃以端明殿學士出督京湖軍馬尋又  
召簽密院其出入皆非上意遂力辭乞歸自是改  
官皆不拜嘉熙元年卒于家贈太師謚文靖所著

有鶴山集九

經要義等書

登萬象樓和計次陽韻

塵纓羈我身對景慵著語青山喚倚欄壯氣臨潁汝層  
雲卷油幕萬嶺眇煙縷酒闌一橫笛樓前葉自雨

送曹尚右從龍知信州分韻得州字

長安十二門冠蓋如雲稠浮驂不停趨九衢滔滔流朝  
握扶桑轡暮行背椒丘駕言往從之道左傷吾輶溫陵  
有佳士清姿秀琅球早酬掄魁望勝泛蓬瀛洲榮進付

膜外寡欲自日休需章臣有母自詭以一州彤襜下青  
冥錦輿居上頭小施活國手彫瘵會有瘳同省並門居  
昔我陪清遊一時四同年氣味骨肉侔而君堂堂去別  
袂挽不留迅商起層旻候蟲催功裘問學常苦難歲月  
忽忽適古今同一岐古豈真難儔願言事樵菴勿作刈  
穫謀

西郊訪梅分韻得尾字

荒煙散牛羊落日向城市天寒萬木脫歲晏羣動弭西

郊有孤芳獨喚春事起幽光耿參月清灑明野水欲開  
未開時似語不語意或疑春較遲的皪下霜蕊誰知春  
風心渾在阿堵裏洞霄逍遙公九隴花月使領客居上  
頭蹇予亦婪尾頗懷去年遊歲月如許駛悠悠竟何成  
總被物化使

重陽領客以老杜重陽日詩分韻凡賓主十八人  
得否字

天根歛秋陽雨畢水歸藪胡為爽常度白晝變昏黝農

功將納場遺秉尚棲畝昨朝告方社卷去日中部義和  
鞭六龍為我作重九雲頑驅復來渾未識藏否終然劃  
劉之金鑱發矇眵所忻陽德競吾豈為杯酒悠然見南  
山陶公意何厚況今祠太宮羣公正奔走

贈畫工王生

七年謫五谿二年守三盧蠻煙瘴雨中不改舊時吾比  
來懶看鏡謂我衰且癯王生忽肖象氣貌何勇腴悔不  
賂王生圖作一病夫庶幾轉而上聽我歸林廬及此未



衰日更讀幾年書

題謝道耘一犁春雨圖

牀頭夜雨滴到明  
村南村北春水生  
老婦攜兒出門去  
老翁赤脚呵牛耕  
一雙不借挂木杪  
半破夫須衝曉行  
耕罷洗泥枕犢鼻  
卧看人間蠶觸爭

次韻虞果州剛簡泛雪

黃雲變黷風雪天  
欲之灞橋尋浪僊  
爐中榾柮熟寒客  
縱欲燒愁能得然  
撥灰嚼句不忍吐  
竟日南望雙眸穿

誰知詩來亦念我字與六出爭明蠲美人美人呼不來  
昭華吹怨樓西偏況有山頭月為友觸撥煙痼撩詩顛  
豈無咏絮謝家集亦有閉戶袁安眠未如山中之至樂  
白玉世界天相連朝看夜聽兩奇絕靴霜爐雪知誰賢  
褰裳急理剡溪櫂明月已旁羌江還

和宇文漢州乞房樓記

房公胸中妙刀尺剪刻玻璃貯寒碧今侯著樓于其上  
竹色荷光得良覲詩來殷勤問故侯別日雖賒情轉密

因思當年飛蓋遊鷗鷺不驚潛鯉出春濃雪絮人影亂  
秋老松雲半天屹蘇公二十四橋月尚愛西湖風月夕  
江山好處余戀嫪縱不即人人自即況今簷撩雲與齊  
激楚高歌友朋集向來寒乞翻自嗤詩掃黃泥已無迹  
功名老我後加鞭文字輸人先奪席欲搜萬象供刻畫  
自有此湖難此筆終當為君記斯遊摹寫蒼顏真六一  
約許侍郎奕諸公酒半宋正仲德之至自都城

人生能得幾回別一別公來四千日我騎紫騮出行春

公指黃扉入當夕誰知行止不關人邂逅天涯復同席  
方看九陌爛紅英忽復濃陰顆青實斷霞明白日靜  
過雨穿林亂雲濕如夢如夢夢耶非曰歸曰歸歸未得  
燹南山岸東流斷關西雲霾北風急酒逢故人一吸易  
語及新事百憂集試問吾歸將何歸梓州遂州有何擇  
況有青山老居士千騎東來闖然入更得可人高帝孫  
又忻末至臨邛客儘判三日作狂醒要話十年胸偪塞  
送杜兵侍孝嚴以華文待制知遂寧府

敝貂衝寒馬聲濕餘杭門外送歸客去年曾送六朱幡  
今年又送四千石更有三令相後先采不盈筐去如織  
濛濛風雪人氣薄漠漠煙塵劍花蝕獨立長空倚天壁  
幾度乞歸歸未得二卿犖犖天與姿不肯隨俗相脂韋  
聲名早落虞舜聰霞裾雲佩明春暉虞舜已死不復返  
雲埋蒼梧天地悲萬物興歇各有期人生出處寧無時  
攬裾結佩下霄漢苟得吾志官無卑史臣昨侍玉皇案  
愛民一語何孜孜願公領此深長思民力竭矣誰其知

更須同志共此事別公且去吾亦歸

六月十四日后殿侍立新永康太守成嘉甫朝辭  
奏事詞氣懇惻上為嘉納嘗隨筆紀其事今鄉  
人祖帳分韻得西字遂書以贈行

嚴精伐鼓趨晨雞龍媒戒仗暗無嘶宰臣奏事左城降  
史臣曳履東階躋永康太守臣申之上殿立吐干虹蜺  
曰臣前領大農簿試郡得請今當西遼帥求通反其使  
金人匿壯招吾攜勿言金能繼前好將貳遼騎搖青齊

時將有反事有間翫歲愒日憂噬臍皇帝瞿然曰是是  
伸頤領首天聽低貼黃更請磔叛將褒恤死事不可稽  
陛下亦聞西事否昔號險阻今多蹊散關皂郊已平地  
白環黃牛猶潰隄分臺列閫越秦視體統漁散人情睽  
上云私意誤大事諄諄切切重提撕申之又言故臣丙  
昔嘗有德于坤倪上顧指臣曰安丙申之頓首如含涕  
紛紛交情異生死獨此推本祛羣迷臣時張拱立帝傍  
螭頭恨無千赫蹠為王留行力不足戴目處此羞梁鵲

官無大小莫非事勇為天子綏羣黎天如有意聽臣歸  
問天重乞青玻瓈

撫州崇仁縣玉清觀道士黃石老工古篆以李功  
父書來

聖學不嗣千餘年并與小學遺其傳其間明道寧乏賢  
謂書小伎合舍旃十字九舛不可鑄楮生墨卿色有冤  
動以經史為執言豈知魏晉幾變遷況今經字宗開元  
請觀未有韻書前訓纂字林形相沿形聲迭推義乃全



韻書既作人趨便未能書法窮根原但以聲韻求諸篇  
形存聲亡韻亦牽叔重少溫工磨研二徐鄭郭相後先  
書法賴此差綿延許李焉得無謬愆楚金分韻猶拘攣  
若更舍此徇俗妍不學操縵求安絃玉清道士來臨川  
用意周鼓兼泰山攜書過我渠江邊試令主柱與畫棖  
椳闌幾礎桷椽已能諧世而取憐猶欲度外求方圓  
眉山夫子思涌泉相與共講扶其偏道士捆載明當還  
更以一語申拳拳能于此處知其端事事物物誰非天

九章八卦莫不然一毫人力無加焉

鶴山書院前為荷塘三即其小嶼築亭久矣春後

八日始榜曰夫容洲

嚴風吹衣落南土手批麤獠藉封虎緣山跨谷三里城  
架竹編茆百家聚天公似為羈人謀閉藏佳境城東陬  
介然用之便成圃下視更得夫容洲水間木末高下照  
名字既同形亦肖自從羸豕伏羣龍紅白相輝轉明耀  
人憐風雪拘繫之委棄衰草蟠寒泥誰知炯炯含內美

正于稿瘁生光輝大書三字為吹送喚起渠陽百年夢  
卻疑二華癡絕人身既隱矣名焉用

送黃宜州寔之任

皇帝親政之初旬史臣了翁侍嚴宸宜州太守當就國  
袖出諫疏前開陳炎荒僻在飛燕外陛下一視同吾仁  
毋云指擣非害事往往四體為不伸臣請選侯如中州  
更飭膚使時咨詢但令正身以率下炎荒雖遠畿甸均  
皇帝顧謂汝可往布宣德意安吾民黃君下殿再拜謝

盡以聖訓關史臣史臣拜手筆之冊以君所聞還贈君  
惟今貪競習成俗公私已屈憂方新紀綱法令不敢知  
恃以立國維蒼旻蒼旻茫茫不可問人情忻戚天笑顰  
願君體此深長思便以聖訓書諸紳心誠求之莫非事  
子苟不欲民無貧

丁大監文伯得余近作讀之疾愈以詩見貽

黔巫之南谿水滋山粗石惡不可治崇寧邊臣務廣地  
山刊石斷林木斯其間掌許號為郡如以土偶安須眉

中州人物猶此任  
纍臣舍是夫何詞  
況于風氣少疵厲  
且幸習俗無澆漓  
飽餐賤米溫舊書  
味雋永忘其疲  
坐看歲龍度丑戌  
幾見秋月弦虛危  
都梁有吏雲端來  
持書火急如符移  
美人家在九芙蓉  
門牆突兀那可窺  
聯緘累牘夢耶非  
一年兩度劃見之  
我詩但能愈君疾  
君解與世醫狂癡  
垂逢休戚信有命  
歎上不使非知醫  
七夕南定樓飲同官

誰將明星貼天宇  
州國宮垣象官府  
更將四七隨天旋

常以昏中殷四序迢迢河漢衡秋旻前有蒼龍履玄武  
牽牛正向西南來左右兩旗北河鼓鼓星之側為天桴  
鼓上三星為織女何年人號天女孫便把牛郎擬夫婦  
不知此是天關梁河漢之津有常度晦明伏見莫非教  
育為文人給嘲侮班曹庾謝猶儻言世上兒曹更堪數  
臨風三誦大東詩須信詞章有今古

羅五星善奕棋贈以詩

少年不識棋但見剝啄更相圍有人指授予衝關

奪角却復持少年不識星但見膈膊膊環如棋亦有  
告予者縮羸伏見元有期七年五谿讀書暇時把二事  
相悅怡久之剗然悟是間有數人不知三百六十一棋  
子此是乾策藏其奇萬有一千五百二十星若以三十  
六乘之乘之既盡除坤策恰與棋數無參差此理極精  
密歸後不復思羅生挾二長過我瀘之湄恍如著我五  
谿上欲與之語無閒時此須靜觀乃有得而我家住西  
山西生揣我何時歸

臨發潼上許侍郎餞於東山賦詩留別

人生出處亦何常又到涪江江上鄉  
山色如逢故人語松聲仍作去年香  
紅裳大舶滿清鏡翠湫白沙明夕陽  
未省此懽何日再擬邀明月照昏黃

真德秀

字希元建寧浦城人四歲受書過目成誦登慶元  
五年進士再中博學宏詞科入閩帥幕召為太學  
正時韓侂胄已誅入對首言改弦更張正當褒崇  
名節進秘書省正字歷沂王府教授權直學士院  
著作佐郎宰相將用德秀忌者詆之遂力請去出  
為江東轉運副使改知泉州再知隆興府十五年



為湖南安撫使知潭州理宗即位召為中書舍人  
尋擢禮部侍郎直學士院入見奏陛下不幸處人  
倫之變流聞四方所損非淺願討論雍熙追封秦  
王舍罪恤孤故事為濟邸興滅繼絕又言賄賂公  
行薰染成風朝廷用人貴少輕老宜褒獎耆艾咨  
訪清廉上皆嘉納宰相史彌遠益嚴憚之噉言官  
抨擊落職罷祠既歸修讀書記曰此人君為治之  
門如有用我執此以往紹定五年起知泉州迎者  
塞路彌遠死移知福州召為戶部尚書入見進大  
學衍義踰年知貢舉拜參知政事三乞祠以資政  
殿學士提舉萬壽宮卒上  
震悼輟朝贈上階謚文忠

## 登南嶽山

煙霞本成癖況復遊名山舉手招白雲欲納懷袖間奇

峰七十二羅列皆蒼顏振衣遇長風浩浩天地寬

送裘司直得請西歸

輕舸龍山頭木蘭作雙櫓飄然裘司直乘向南昌去問  
君鵷鸞中脫身遽如許棲遲三十年始得官掌故少須  
上上考豈不登省戶自言野心性眯目九衢霧脩竹歲  
云晚萱草秋亦暮嗷嗷投林鳥猶得反其哺江西父母  
邦非復昔饒裕蠻煙一腥穢樂歲且狼顧遺黎空杼軸  
行旅窘刀布天門宵萬里可望不可愬君今佐元帥安

危繫一路瘡痍俟滌濯盡諾歸飲助先聲姦人惴高節  
懦夫慕過當再前席一正天子度白鷗沒浩蕩蒼鵬在  
指呼我亦南陔人扁舟從此具

司理弟之官岳陽相別定王臺悽然感賦

二首

定王百尺臺長安萬里目昔人思親心山川誰能局於  
焉共登臨使我增感觸微霜隕陔蘭悲風撼庭木銀山  
在河許白雲但空谷搔首重裴回冥冥江樹綠

先民不可見懷哉金玉音士雖一命微愛物宜存心矧

茲園扉內白日變重陰求情箠楚下冤哉詎能禁諄囑  
漫弗省鬼神為悲吟子往泣其職朝夕惟欽欽祥刑勿  
畱獄斯語真良箴

浦城勸糶

陽和二月春草木皆生意那知田野間斯人極顛顛殷  
勤問何由父老各長喟富室不憐貧千倉盡封閉只圖  
價日高弗念民已敝去年值饑荒自分無噍類幸哉活  
至今且復遇豐歲庶幾一餉樂養育謝天地豈期新春

來米穀更翔貴況又絕市無縱有濕且碎何以充饑腸  
而復多拏累恨不死荒年免使見憂畏我聞父老言痛  
切貫心肺行行至平洲景象頓殊異白粲玉不如一升  
纔十四問誰長者家作此利益事父老合掌言子文姓  
陳氏起家本儒生疇昔樂賑施憶昨艱食時巨室爭謀  
利米斗三百餘獨收七十二三都數千口受彼更生惠  
開庫質敝衣假此賑貧匱取本不取息所活豈勝計我  
曹非此翁久作溝中齒吁嗟薄俗中乃有此高義吾邦

賢使君愛民均幼穉一聞平糶家褒賞無不至或與旌  
門間或與錫金幣獨有潁川翁寵光未之被故作行路  
謠庶徹鈴齋邃且俾殖利徒聞風默知愧天道極昭明  
勿作幽遠視

會三山十二縣宰

皇皇造化鈞索篇生萬彙林林滿穹壤異體實同氣痛  
癢本相關彼已當一視矧惟守令職休戚我焉寄盍推  
若保心睠焉撫孩穉橫目事征求往往學頑痺牀剝膚

已侵鷹擊毛盡摯但期已豐腴  
遑恤彼顛顚近來二十年  
貪風日滋熾蒲萄得涼州  
西園闕成市環瞻郡邑間  
大半皆汙吏民窮盜乃起  
原野厭枯槁哀我罹禍徒  
念之輒揮涕天地忽開張  
清飈掃氛曠我乃于此時  
擁旄忝為帥顧慙老儒生  
蹇拙乏長技同官為僚友  
努力圖共濟惟閩古大都  
星羅邑十二豈無良大夫  
與我同厥志要如羔羊直  
委蛇自無愧勿為碩鼠貪  
躑躅乃多畏上方明黜陟  
我亦公舉刺民言即豐碑  
令問疾郵置黃

堂一卮酒殷勤抒至意慎勿多酌予憂心正如醉

遊鼓山

六月二日偕潛夫諸友遊鼓山飲湧泉亭明旦登天  
風海濤坐白雲亭追懷昔遊愴然有感偶成拙詩奉  
呈并簡住山明師

嚴宸有追詔趣上太守符疲民未蘇醒還顧空躊躇來  
尋靈源盟喜與佳客俱始酌清泠泉一浣丹墨誇超然  
煩溽中置身在水壺遲明陟危亭雲濤渺空虛煙霏倏



開闔峰巒時有無偉哉此絕觀雄壓東南隅蒼崖萬仞  
立四面環瓊琚翠木巧蔽虧亭午清陰敷令人澹忘歸  
似到真華胥憶昨泛蓮日選勝邀朋徒摩挲巖上刻慨  
仰趙與朱舉觴酌且盟一節期終初重來三十年恍如  
隔朝晡並遊四五人存者獨老癯有懷子陳子感歎為  
欬歔子抱明月終我方長途趨顛踣懼不免儆省當何  
如願言祝同社著力相攜扶禪伯亦可人新結峰頂廬  
老我故勸遊軒冕非所娛會須脫塵鞿來依懶瓚居

挹僊亭

漢宮葦篴兒呱呱濟南梓柱陰扶疎富平家人正媮樂  
安昌帝師工獻諛子真東南一尉耳黃綬淒涼百僚底  
手持短疏叩天閭義激丹衷淚橫背翩然一朝徑拂衣  
愛君無路空依依人傳九江已僊去吳門再見是耶非  
神僊茫茫那可測上帝從來賞忠直天下果有驂鸞人  
合領羣真朝北極自從舉手謝世間千年白鶴何時還  
玉簫聲斷杉檜冷祗餘丹竈留空山谷口之孫古膚使

亭斲青冥挹僊袂耿耿應懷貫日忠飄飄豈羨凌雲氣  
我來快讀華星篇清徹毛骨風冷然何當結茆最高頂  
一榻容我分雲煙

嚴羽

字儀卿號滄浪與戴石屏同時其論詩  
欲如那叱太子析骨還父析肉還母

尋甯山人所居

幽人以道隱結室岵之東余亦避世客逢君於此中鳥  
因留食至泉為煉丹紅向晚下山去月高秋色空

關山月

今夜關山月偏能照馬鞍  
盧龍征戍客圓缺幾回看  
遙想金閨裏應悲玉露寒  
黃沙三萬里何日是長安

行子吟二首

行子在江海飄飄靡常踪  
有如芒碭野朔風捲飛蓬  
朔風無休期飛蓬日千里  
散落天地間寧有復歸理  
塞雁西北來一叫三徘徊  
何時別沙漠昨夜宿陽臺  
同羣一相失羽翮常低摧  
人物有殊性奈何懼此哀

憶昔客遊初結交，重豪邁，高冠湛盧劍。志若輕四海，白  
首悔前圖。蹉跎天一隅，寒冬劍門道。失路空踟躕，深林  
聚虎豹。絕壁號猩猩，鼯雪深車軸。折征馬，驚啼呼何當返。  
故處餐黍居田廬，淚下不能禁。腸轉如轆轤。

我友遠言邁

朔風卷秋樹，白日寒無光。是時鴻雁來，四野何蒼茫。我  
友遠言邁，使我結中腸。如何攜手歡，一旦成異鄉。行旅  
有期程，遊子多悲傷。置酒欲高歌，淚來沾我裳。四座慘

相顧征馬亦徬徨未知會面日且復盡茲觴

悠悠我行邁

悠悠我行邁邈在天一方道路無終極時節異炎涼路  
逢故里親揮泣問我鄉妻子別離久不知今存亡中原  
多白骨城邑聚豺狼遠去無僮僕思還絕餽糧寄語家  
中人遠行良可傷

朝日臨高臺

朝日臨高臺睠彼芳樹間上有共棲鳥和鳴何關關爾

乃慕儔侶我胡獨不然良友在萬里邈然河與山聚會  
豈不思歲月倏已殫未必無他人要非心所歡

僊遊

三首

憶讀玲瓏篇來往虛皇閣空見白芙蓉秋風幾凋落昨  
逢紫陽君共有丹臺約下視塵埃中冠纓縛猿攫世事  
行若此悠悠復何託

朝別簡寂觀夜行石鏡溪溪光照厓綠月色正相宜石  
上三道士頎然好丰姿或弄金光草或把珊瑚枝憑風

招素手賜我一玉卮歎我事遠遊蕭颯朱顏衰長林孤  
月落羽蓋何歲隄垂垂乘之去棄我忽若遺明發聞無  
覩但有青鸞啼

瀑布似明月上有石梁橫矯首望東海正見蟾蜍生揚  
輝天漢間下照蓬丘城桂實幾凋落嫦娥空聞名咄哉  
玉斧子不如白兔精靈藥不服食執柯獨何成迢迢彩  
雲外誰吹白玉笙竦身一長聽予若出寰瀛

登豫章城



憂來不自得登城望高天寒雲四面起朔氣下長川脫  
劍且却坐君知心惘然奈何平生志鬱抑江湖間凜凜  
秋風來茫茫落日晚長憂生白髮沉想忘朝飯向來經  
濟士本是碌碌人蕭曹刀筆吏樊灌屠販臣徒步取勲  
業漢道為光新我今何為者飄飄去鄉國狂歌豫章城  
醉卧楓江碧但取英雄笑終慙倜儻生名當以德載事  
恥因人成獨酌還獨酌哀歌還寂寞安得凌風翰為君

拂寥邈

遊臨江慧力寺

舟中望古剎川上移琴樽  
隱隱林閣見迢迢鍾梵聞  
列岫不離席驚濤常在門  
風帆與沙鳥汎汎隨朝昏  
天高一旛挂室靜衆香焚  
煙起多近郭鴉歸無遠村  
松際尚微雪經年來暮援  
賞惟靜者契法對高僧論  
安得息塵駕永懷瞻獨園  
明朝別此去惆悵滿松雲

山居即事

稍欣入林深已覺煩慮屏  
霜果垂秋山歸禽度嵐嶺  
紛

紛葉易積漠漠雲欲盛澗戶寂無人松蘿窅然暝惟聞  
山鳥啼月上柴門靜終歲寡持醪延歡聊煮茗羣書北  
窻下帙亂誰能整

廬陵客館雨霽登樓言懷寄友

終日坐汾渙邈然無少欣登樓一周覽始見萬山羣微  
雨洗殘暑青天捲浮雲襟懷兩廓落朗若見夫君見君  
君何在顧影還獨笑吏非金門遊隱異滄洲調江明秋  
月白山空夜猿嘯徒事百卷文未返一竿釣留滯豈勝

愁非君誰與謀水寒終赴海雁遠暫賓秋舉世不可語  
猶當傲巢由贈君三尺劍永駕五湖舟

夢遊廬山謠示同志

昨夜月落西窻陰倦推素枕凭石琴身居紅塵不自覺  
夢入廬山深復深廬山深處在何許五老僊人邀我語  
眉如秀雪顏桃花酌酒相酣坐箕踞明河九派倒西來  
石嶼巉絕古道開五公握手向我笑不見劫火揚塵灰  
獨騎一鹿窮蒙迴眴然醉踏青錦苔松風號嘈何清哀

湍飛瀑捲萬壑雷忽然驚起迷所向四坐已失黃崔嵬  
披衣徬徨還太息我與世途何所屑亂世茫茫飛蝶蟻  
囊中別有金膏訣須君之行當何如共向丹崖卧松雪

還山吟

日暮望南山悵然歸思發如何山中客屢看城頭月城  
頭月照女蘿秋石磴潺湲瀉碧流巖猿久別應惆悵澗  
鳥相呼亦共愁城南故人與我好令我忘却歸山道昨  
夜西窗夢到家忽驚千嶂芝花老朝來舟子促辭君回

首空江語尚聞別後莫嗟難見面相思只望嶺頭雲

孺子臺吟

去年醉與東湖別欲上衡湘泛秋月君家留我却遄迴  
悵望還成阻脩濶西山縹緲翠屏開復憶滕王倒玉杯  
經過始識洪厓井調笑重登孺子臺臺前呼酒折荷花  
水淨煙明散落霞舉杯失笑君何在望斷行雲空咄嗟  
故人別後還愁緒此都不是余畱處興來目送海邊鴻  
歸心挂在閩溪樹

思歸引

海上芝草綠芊芊洞門一閉今幾年  
僊驥去時留紫鞭挂壁見之心惘然  
欲歸即歸亦由我不待功成何不可  
堯舜未能屈巢由自餘王侯何足遊  
武陵春水綠蕭蕭就中亦有桑麻郊  
近聞秦人笑相語待我東溪種碧桃  
送戴式之歸天台歌

吾聞天台華頂連石橋石橋巉絕橫  
煙霄下有滄溟萬折之洪濤上有赤  
城千丈之霞標峰懸磴斷杳莫測中

有石屏古僊客吟窺混沌愁天公醉飲扶桑泣龍伯適  
來何事遊人間飄飄八極尋名山三花樹下一相見笑  
我蕭颯風沙顏手持玉杯酌我酒付我新詩五百首共  
結天邊汗漫遊重論方外雲霞友海內詩名今數誰羣  
賢翕沓爭相推胸襟浩蕩氣蕭爽豁如洞庭笠澤月寒  
空萬里雲開時人生聚散何超忽愁折瑤華贈君別君  
騎白鹿歸僊山我亦扁舟向吳越明日憑高一望君江  
花滿眼愁氛氲天長地濶不可見空有相思寄海雲



送吳會卿再往淮南

故人身披紫綺裘腰佩寶玦騎驊騮英風俠氣橫四海  
辭我遠向淮南遊淮南桂樹應猶在八公舉手遙相待  
明月高懸五兩頭隨君千里過淮流十年鞍馬邊城道  
又是邊城見春草春草萋萋路入秦長安北望空愁人  
荆楚奇材多劍客感慨相逢思報國男兒事業早致身  
青鬚須防霜雪迫我向人間久拂衣白雲相伴掩巖扉  
調琴鼓罷清商曲愁見孤鴻天際飛

三衢逢周月船

戎馬相逢日那知復此間客愁詩莫遣世事酒相關江  
上孤舟在天隅兩鬢斑更將憂國淚滿袖送君還

蜀女怨

幾時離月峽五見紫蘭凋塞鴈隨魂斷江花逐淚飄沙  
頭南北客京口去來潮日日無消息空登萬里橋

聞鴈

遠客驚秋鴈高樓復異鄉聲兼邊哨苦影落楚雲長此

夜頭堪白他山葉又黃年年洞庭浪飄泊更無行

樟樹鎮醉後題

吾憐樟樹好取醉欲無還酒壓鵝兒色詞歌雉子斑朱  
樓當碧水紅日下青山興罷揚鞭去蒼蒼煙霧間

豫章城

愛此城高處回鞭醉每醒江花兩岼白煙樹一行青雲  
學山舒態天隨水賦形吾多徐孺子獨向此沉冥

閒居寄友

蕭條遺世心江海坐來深擁褐閒窺沼思山欲借琴有  
幡煙際寺無葉水邊林不見同袍友憐誰伴苦吟

訪益上人蘭若

獨尋青蓮宇行過白沙灘一逕入松雪數峰生暮寒山  
僧欣客至林閣借人看吟罷拂衣去鐘聲雲外殘

出塞行

將軍救朔邊都護上祁連六郡飛傳檄三河聚控弦連  
營當太白吹角動遙天何日旄頭落神州得宴然

江樓夜月懷故山友人

昨夜江樓月思君好斷腸猿聲相應發山色更青蒼楚  
塞來書遠閩關隔夢長今朝看愁鬢為爾半成霜

有懷閩風山人

把酒忽惆悵君今吳楚間孤雲隨馬首風雨隔河關心  
事竟安在此行殊未還空將百年意泣向寶刀環

懷南昌舊遊

昨在南昌府清遊不可窮杯行江色裏權進月明中樓

笛吹晴雪菱歌漾晚風坐來懷舊迹萬里一飄蓬

江行

暝色蒹葭外蒼茫旅眺情殘雲和雁斷新月帶潮生天  
到水中盡舟隨樹杪行離家今幾宿厭聽櫂歌聲

塞下

鞍馬連年去關河萬里賒將軍思報國壯士恥還家大  
漠春無草天山雪作花誰憐李都尉白首沒黃沙

登滕王閣

高閣憑空浩蕩開當時遺跡幾荒苔煙舍晚市悠悠見  
沙帶澄潭渺渺回此日登臨分壯氣百年淪落憶雄材  
可憐萬古神交意日暮蒼涼一笛哀

夜泊

夜聞估客送將歸葭菼蕭條月色微萬里江湖何處極  
孤舟鴻雁自相依杯拋黃菊乾賒酒城掩清砧罷搗衣  
不奈此時心斷絕長沙南去故人稀

將至潯陽途中寄諸昆弟

渺渺孤帆去幾程悠悠天際望湓城一身避亂辭鄉國  
千里相思隔弟兄猿叫匡廬寒暮色鴈過彭蠡帶秋聲  
江湖此去多飄泊腸斷風塵遠別情

客中別吳季高

悠悠遠別半生悲白日相逢又話離海內風塵愁未已  
天邊消息到何時洞庭旅雁春歸盡瓜步寒潮夜落遲  
惆悵孤舟從此去江湖未敢定前期

寄郭招甫時在潯陽



夢向三江買釣船挂帆西去白雲邊  
窻間曉色香爐見門落寒聲瀑布懸  
百年酒興陶彭澤四海詩名孟浩然  
何日真尋塵外跡焚香酌茗話先賢

送崔九過丹陽郡上荆門省親

江國歸心一雁牽河橋分手數杯傳  
千崖萬壑秋聲裏匹馬孤帆落照邊  
牛渚寒波翻極浦荆門晚樹合遙天  
他時莫枉瑤華問南北相思各渺然

楚江晚思

旅思遙遙倦向南誰家煙火起晴嵐孤城歸鳥連寒角  
極浦斜陽帶遠帆楓葉自能悲楚客竹枝何用怨江潭  
今朝欲寫風波恨千里書成手自緘

送趙立道赴闕仍試春官即事感興因成五十韻  
嗣聖中天日遺氓憶漢時一王新盛禮萬國賀重熙官  
爵霑寰宇光明冠本支窮冬辭老母吉日赴京師祖席  
明斜照寒江結暮澌停杯愁把袂立馬語臨岐草動春  
前色梅繁雪後枝湖山饒逸興士友重遊嬉菱唱工迷

客荷舟穩放維土風珍縞帶吳饌熟蓴絲塔寺開金碧  
樓臺漾淼瀾雲連勾踐國江動伍胥祠閭闔春朝早觚  
稜霽景遲柳迎僊仗輓花簇御樓歌首宿來宛馬櫻桃  
薦寢帷周家千歲歷漢殿萬年卮駐驛山川遠橐弓歲  
月移天俄憂杞國日再仰咸池弓劍羣臣淚園陵故國  
悲乾坤開帝統雨露豁宸私蜂蠆何為爾豺狼欲問誰  
箭流元帥幕城立叛營旗國體存矜恤皇猷務遠綏且  
從鷹一飽自待虎雙疲復說京西亂愁連蜀道危倉皇

分隊伍指點護藩籬狙詐終勞馭遊魂不足羈幾年腥  
戰血今日痛瘡痍宗社神靈在邦家德澤遺會聞淝水  
捷可復雁門蹠草詔詞頭切蒲輪禮意卑賢良多選拔  
社稷在扶持舉動新羣目經綸佇一夔長沙何遽往鄭  
卜竟堪疑莫以朝廷重翻令盜竊窺稍懲鷹隼擊庶使  
鳳凰儀薪膽方無倦輿圖正入披王孫思報國天府待  
忠詞世道多為忌波流幸勿隨從容陳古昔感慨論邊  
陲仕進雖云始平生見在茲青氍今可復綵服更相宜

漂泊微軀老蹉跎困翮垂散材元自逸正論竟焉裨誤  
賞騷人作深慙國士知叫閤時已晚鳴劍志空馳鬱鬱  
驅流俗悠悠歎亂離羊裘終隱去魚釣復何之出處從  
今隔飛騰不可追濟時須俊傑願覩中興期

古懊儂歌

朝亦出門啼暮亦出門啼蛛網挂風裏搖思無定時

塞下曲

孤城莽莽秋天外竟日無雲空自哀忽怪一時天盡黑

合羣鴻雁向西來

聞笛

江上誰家吹笛聲  
月明霜白不堪聽  
孤舟萬里瀟湘客  
一夜歸心滿洞庭

燕 此篇或云三休作

巢破春雛半不存  
銜泥空傍主人門  
一生巧計輸黃雀  
飲啄官倉長子孫

宋元詩會卷四十七